

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj:01-02-11129/22
Sarajevo, 30.05.2022. godine

OPĆINA NOVI GRAD SARAJEVO

OPĆINSKI NAČELNIK

PREDMET: Vijećnička pitanja i inicijative, dostavlja se

Na 15. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

a) Vijećničke inicijative

-vijećnica Merjem Ridžal-

1.INICIJATIVU ZA SANACIJU DVORIŠTA U ULICI ALIBEGA FIRDUSA ČIKMA

Tokom posjete Savjetu MZ Švrakino selo I i obilaskom terena uz prisustvo predstavnice stanara u ulici Alibega Firdusa Čikma, predstavnica stanara je istakla problem neravnog terena odnosno udubljenja u dvorištu ispred zgrade koje predstavlja svakodnevni problem stanarima koji koriste dvorište i za parkiranje vozila te dolazi do oštećenja vozila prilikom kretanja po neravnom terenu.

Mišljenja sam da bi jednostavna sanacija u vidu mašinskog poravnjanja terena i nasipanja tamponom otklonilo problem makar kratkoročno dok se ne ostvare uslovi za asfaltiranje puta kroz dvorište (kružni tok) i parking mjesta sa strane tog kružnog puta.

U prilogu dostavljam mikrolokaciju dvorišta sa označenim dijelom gdje je potrebno mašinsko ravnanje terena i nasipanje tamponom.

-vijećnik Adis Šahmanija-

1. Podnosim inicijativu da se u ulici Samira Radovca ugrade prinudni usporivači brzine (ležeći policajci).

Naime u ulici Samira Radovca, koja je ujedno i alternativna ulica svakodnevno bude veliki broj djece koji istu koristi za igru. Nesavjesni vozači ugrožavaju sigurnost djece i stanovnika ove ulice.

2. Podnosim inicijativu za obrezivanje rastinja uz ulicu Rogatička kroz cijelu ulicu.

Pomenuta ulica ja zarasla i postojeća ulična rasvjeta ne koristi svrsi. Veliki broj kablova je urastao u rastinje i postoji svakodnevna opasnost od pucanja istih, što ugrožava sigurnost građana i djece koja svakodnevno odlaze i dolaze u školu kroz pomenutu ulicu.

3. Podnosim inicijativu za otkup zemljišta zbog proširenja ulice Senada Čolića, koja je ujedno ulaz u naselje iz pravca Rajlovac.

4. Podnosim inicijativu za izmjenu godine pogibije na spomen obilježju Sokolje na ime Ibrahimović Omer.

Naime pomenuti borac je poginuo 1993.godine, a na spomen obilježju je upisana 1992.godina, te porodica zahtjeva izmjenu na spomen obilježju.

5. Podnosim inicijativu za proširenje dječijeg igrališta i postavljanje dodatnog mobilijara u ulici Franje Kluza. Svakodnevno na pomenutom igralištu bude 40-50 djece, koji nemaju dovoljno mobilijara za korištenje.

-vijećnik Silvije Kristić-

1. Molim službe te direktora Lokoma da mi objasne trenutni status strelišta na Žući. Ko upavlja ovim vlasništvom Općine Novi Grad na koji način, prema kojim odlukama te objasne sigurnosnu situaciju na istom.

Naime prošlog vikenda sam otišao na strelište kao rekreativac I vijećnik. Tražio upotrebu strelišta za dvije osobe I platio 10 KM za šta sam dobio uredan fiskalni račun. Potom mi je objašnjeno da obzirom da je vikend, a vikendom treniraju klubovi moram platiti dodatnih 10 KM za šta nisam dobio nikakvu potvrdu ni račun. Primjetio sam obilježja dva kluba Caracal I KPS Ilidža te navodno imaju ugovore o korištenju strelišta sa Lokomom.

Osoba koja je radila na kasi Lokoma je bila u obilježjima KPS Caracal, djevojka nekih 20 godina koja je ponudila I iznajmljivanje vatrenog oružja, municije. Nisam siguran da je uposlenik Lokoma.

Tražiti ću inspeksijski nadzor strelišta redovno I od općinske I kantonalne inspeksijske službe u dane vikenda kako bi smo bili sigurni da nema kršenja propisa I sigurnosti za korisnike strelišta I naše građane.

2. Molim službe te direktora Lokoma da mi odgovore na pitanje dugoročnog plana upravljanja strelišta na lokalitetu "Žuč".

Da li u ovom momentu Lokom posjeduje odgovarajuća odobrenja za upravljanjem strelištom "Žuč", osposobljeno I certificirano osoblje za upravljanjem arsenalom oružja, uslove držanja oružja, edukaciju I monitoring rekreativaca koji koriste strelište, cjenik usluga na strelištu koji obuhvata sve segmente upotrebe istog?

Na koji način je dugoročno planirano upravljanje strelištem, da li je planiran javni poziv za dodjelu strelišta pod koncesiju, koji su kriteriji za izbor najboljeg ponuđača, način I uslove potpisivanja ugovora sa sportskim klubovima te obaveze I prava klubova pod ugovorom?

Da li je ugovor potpisan sa KPŠ Caracal I KPS ilidža? Da li je raspisan javni poziv ili obavijest o mogućnosti potpisivanja ugovora sportskih klubova I strelišta? Ako su navedeni ugovori potpisani molim da mi se dostave uslovi istog te odluke na osnovu kojih su se potpisali.

3. Molim službe da mi odgovore šta je urađeno po pitanju koje sam postavio na sjednici od 29.7.2021. da li je urađen inspeksijski nadzor, da li su izdate kazne za prekršioce te nalozi za uklanjanje poljoprivrednih površina, smještaja za kućne ljubimce, terase kafića.

Molim službu za inspeksijske poslove da mi odgovori na pitanje kada je zadnji put urađen nadzor na području Dobrinje o upotrebi površina terasa u ulici Bulevar Branilaca Dobrinje I šta je nadzorom ustanovljeno. **Obrazloženje:** Molim vas da mi odgovorite da li su za navedene površine izdate dozvole fizičkim I pravnim licima za upotrebu istih jer je evidentirano da se iste koriste za čuvanje kućnih ljubimaca, terase kafića, poljoprivredu I površine za odmor I rekreaciju. Da li su oni koji iste koriste obezbjedili bezbjednost istih I ispunili uslove za navedene aktivnosti.

4. Ponavljam pitanje obzirom da nisam dobio adekvatan odgovor te hitnu sanaciju od strane izvođača radova .

Molim službe općine da mi odgovore na pitanje koliko je koštalo uređenje zelenih površina u ulici Bulevar Branilaca Dobrinje te pojasa do ulice koje je obavljala firma Ame doo Breza, da li je I u kojem trajanju obezbjeđena garancija na urađene radove I ko je nadležan za održavanje istih.

Obrazloženje:

Uvidom u stanje pomenutog pojasa evidentiran je veliki broj oštećenja pločnika I klupica na istom uz propuste u popunjavanju praznina između blokova koje omogućuju nakupljanje vode I propadanje segmenata. Budući da su radovi izvođeni nedavno tražim odgovornost za eventualne propuste I saniranje oštećenja.

5. Ovim putem podnosim inicijativu za hitno funkcionalno I sigurnosno rješavanje područja kod mosta na južnoj longitudinali u naselju Aneks.

Obrazloženje : Most I njegova okolica na južnoj longitudinali predstavlja veliki problem za stanare ovog naselja ali I naselja u neposrednoj blizini obzirom da se radi o veoma frekventnoj lokaciji, kako za vozila tako I za pješake, a nekoliko posljednjih godina je potpuno zapušteno kao I okolna zelena površina ted io ispod mosta koji je postao sklonište narkomana te predstavlja opasnost za stanovnike.

Ovim putem podnosim inicijativu da se most I njegova okolina dodatno osvijetli te uredi zelene površine, kao I staze za pješake. Pored toga pozivam struku saobraćaja da hitno riješi prelaz za pješake pored mosta jer veliki broj djece svakodnevno prelazi ulicu na dijelu koja nije dovoljno jasno označena te samim tim I sigurna. Potrebno postaviti dva mala sporivača brzine prije I poslije pješačkog prelaza te dodatno označiti sam prelaz po uzoru na druge dijelove grada u rizičnim zonama sa tzv. 3D linijama (zebrom).

6. Ovim putem podnosim inicijativu za obnovu usporivača saobraćaja u ulici Geteova sa označenim pješačkim prelazom na istom.

Obrazloženje :Usporivač brzine saobraćaja u ulici Geteova pred ulazom u OŠ Meša Selimović je u protekom period pretrpio ozbiljna oštećenja te je neophodna sanacija istog kako bi se spriječila oštećenja na automobilima koja svakodnevno prelaze preko istog. Pored toga horizontalna signalizacija je potpuno nevidljiva pa je ovo jedan od prioriteta za građane naselja C Faza kao I za djecu navedene škole.

7. Otvorenim pismom mi se obratilo Sportsko Plesni klub Astoria iz Novog Grada u kojem izražavaju nezadovoljstvo odnosom općine I službe prema ovom kolektivu koji je u našoj opštini najveći I najmasovniji ovog tipa sa ogromnim rezultatima I aktivnostima u prošlosti.

Obrazloženje: Nekoliko zadnjih godina aktivnosti ovog kluba nisu podržane na adekvatan način čak I u uslovima smanjenog budžeta te sredstava za aktivnosti iz oblasti kulture I sporta. Međutim posljednji čin je pokazatelj da se ipak primjenjuju dvostruki kriteriji prilikom odabira učesnika u manifestaciji "Novogradski Dani". Naime plesni klub Astoria je odbijen te je umjesto njih prihvaćeno učešće plesnog kluba Bolero, a kao jedini razlog je navedena namjera da se "malo promjeni".

Molim vas da mi odgovorite koji su kriteriji ovdje bili presudni obzirom da je plesni klub Astoria godinama uspješno učestvovao na ovoj manifestaciji kao I da je veoma uspješno predstavljao opštinu na mnogobrojnim takmičenjima u I izvan naše zemlje kao I da je vlastitim sredstvima organizovao mnogobrojne festivale I takmičenja na području opštine Novi Grad.

8. Danas su mi se otvorenim pismom obratili stanovnici ulice Ramiza Salčina od broja 120-150 sa Molbom za hitno rješavanje problematike vezano za uspostavu saobraćaja I pješačke zone u njihovoj ulici nakon nemilog događaja I stradanja djeteta ranije u ovom naselju. Ista molba je dostavljena I na kabinet načelnika, službe za inspekcijske poslove te općinskom vijeću Novi Grad.

Obrazloženje:Molim navedene da se o ovome hitno izjasne I odgovore našim građanima te zakažu hitan terenski sastanak sa saobraćajnom strukom I građanima na temu optimalnog rješenja koje minimalno uznemirava stanovnike pomenute ulice ali i pruža veći stepen sigurnosti za djecu koja idu u školu Aleksa Šantić. Obrazloženja koja su do sada dolazila iz službi nikako nisu u skladu sa stvarnom situacijom na terenu te tvrdim da ova neće pružiti veći nivo sigurnosti za djecu obzirom da ljudi direktno izlaze iz svojih dvorišta na ulicu već se kako sam I ranije rekao problem prebacuje na drugu adresu kako bi se postigla prividna briga nadležnih te namjera da se problem trajno riješi.

-vijećnik Alem Logo-

Inicijativa – "Sanacija krova stambene zgrade na lokalitetu Saraj polja"

Pokrećem inicijativu prema nadležnim službama općine Novi Grad Sarajevo, da se izvrši sanacija krova na stambenoj zgradi u naselju Saraj polje (Adija Mulabegovića, ulazi 1 i 3).

Po dojavi komšija posjetili smo porodicu samohrane majke Sabahe Dukmenić, čiji je muž Zejd Dukmenić preminuo 2019. godine u 54-oj godini. Zejd je inače bio istaknuti gazija ARBiH, pripadnik jedinice Crni Labudovi, koji se vratio iz inostranstva da podrži borbu protiv agresora na BiH.

Iza Zejda su ostala i 2 sina koji su studenti i volonteri u zajednici. I nakon ratnog angažmana, Zejd je bio aktivan u odgoju mladih kroz sport, gdje izdvajamo funkciju prvog poslijeratnog predsjednika Taekwondo saveza BiH. Naime, njihov haustor se već nalazi na listi prioriteta za sanaciju krova na adresi Adija Mulabegovića 1 i 3 (dva haustora sa zajedničkim krovom). Situacija je prilično kritična u slučaju padavina, njihov krov prokišnjava do te mjere da su plafoni od rigipsa skoro u stanju obrušavanja zbog čega postoji opasnost po njihovu bezbjednost i sigurnost. Da ne dođe do poplave stana, postavljaju lavore i šerpe te se na taj način se bore vrijeme kiša (u nastavku su fotografije devastiranog stambenog prostora).

Obrazloženje:

S obzirom da je sistem održavanja i upravljanja objekata zajedničkog stanovanja počesto komplikovan za obične ljude, molim Vas da pokušamo učiniti sve što je u našoj mogućnosti da olakšamo ovu situaciji porodici rahmetli Zejda Dukmenića. Vjerujem da općinske službe mogu pomoći ovoj porodici u smislu analize stanja, te usmjeravanja svih učesnika ovog procesa da se dođe do rezultata i oporavka stanja. Siguran sam da postoje modeli rješenja ovih i sličnih situacija, a koje iskustveno poznaju stručne službe u općini.

-vijećnica Enisa Spahić-

1. Inicijativu za ugradnju LED rasvjete u ulici Branislava Nušića i redovno orezivanje stabala koja zaklanjaju rasvjetna tijela, mjesna zajednica Saraj Polje

Obrazloženje prijedloga inicijative: Zbog zastarjelosti i neispravnosti sijalica u postojećim rasvjetnim tijelima ulica je jako loše osvijetljena, a zbog neredovnog orezivanja stabala jedan broj rasvjetnih tijela je dijelimično ili potpuno zaklonjen te u tim djelovima ulica je u polumraku. U ulici se nalazi osnovna škola sa najvećim brojem učenika "Aleksa Šantić". Zbog sigurnosti prije svega đaka, ali i stanara ulice molim da se što prije ugradi LED rasvjeta posebno u kraku ulice pored škole, te planira redovno orezivanje stabala koja zaklanjaju rasvjetna tijela.

2. Vijećničko pitanje, u kojoj je u fazi izrada i postavljanje usporivača saobraćaja na području mz Saraj Polje, u ulici Branislava Nušića, a vezano za:

- Podnesak grupe građana broj: 02/13-04-17074/20 od 2.10.2020. godine
- Zaključak Savjeta mz „Saraj Polje“ br: 02/ 13-04-339/20 od 3.09.2020. godine
- Inicijative koju sam kandidovala prošle godine u 7. Mjesecu

Obzirom da je odgovor Službe za lokalnu samoupravu bio, a nakon izvršenog uviđaja, da će se realizaciji traženog pristupiti nakon sticanja uslova.

U ulici se često čuje naglo kočenje automobila, škripa guma, a znamo da se nalazi osnovna škola i da se istom svakodnevno kreće veliki broj djece, đaka. Čekamo li, nedaj Bože, da se nešto loše desi da bi se stekli uslovi?

3. Vijećničku inicijativu koju sam kandidovala u decembru prošle godine, a koja se odnosi na iznajmljivanje prostora Udruženju „Oaza“ u SR Centru Safet Zajko.

4. Inicijativu za davanje saglasnosti za postavljanje obilježja, Spomen ploče kod kasarne u Rajlovcu ubijenim vojnicima bataljona Vojne policije u brigadi za Taktičku podršku Oružanih snaga BiH, Nedeljku Radiću i Arminu Salkiću na molbu rodbine i prijatelja koji će u potpunosti finansirati podizanje Spomen ploče. Predlažem da se ova inicijativa realizuje putem naše općine, tj. putem Službe za urbanizam i Pravobranilaštvo općine i to na način zauzimanja javne površine radi postavljanja obilježja na mjestu pogibije pripadnika OS BiH ili na drugi zakonom predviđen način utvrđen od strane služe. Opis i oblik obilježja usaglasiti sa nadležnim službama Općine Novi Grad i porodicama ubijenih.

5. Inicijativu da nadležna služba dostavi urgenciju KJKP "ViK" za sanaciju otvorenog šahta u ulici Branislava Nušića do broja 111 b, s obzirom da problem ne rješavaju gotovo dva mjeseca.

U ulici je veća frekvencija auta, tako da drveni poklopac nije dugoročnije rješenje. Postoji opravdan strah, posebno u večernjim satima od moguće nesreće.

Slika u prilogu.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a